

صبرى السعدى

عشك شاعر

شعر شعبي عراقي

صدرت الطبعة الأولى فى يولييه 2019

بطاقة الكتاب

عشك شاعر	عنوان المؤلف
صبرى السعدى	المؤلف
شعر شعبي عراقى	التصنيف
13670 - 2019	رقم الإيداع القانونى
978-977-6726-37-6	الترقيم الدولى
100 صفحة	عدد الصفحات
447 الطبعة الاولى يولييه 2019	رقم الإصدار الداخلى
20X14	المقاس

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



مؤسسة
النيل والفرات
للطبع والنشر والتوزيع
أسسها الشاعر ناجى عبد المنعم
حزيران 2017

رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 فاكس: 020554372901




النيل والفرات

nagyegy200064@gmail.com




[alnilwaalfourat](http://alnilwaalfourat.com)

alnilwaalfourat@gmail.com

المقر الرئيسى: ج.م.ع. محافظة الشرقية - العاشر من رمضان - مجاورة 13 - أمام سنترال 13 - عقار 304

الاهداء ...

الى
من جعلني اعشق الشعر
الى
من علمني الحب
الى والدي رحمه الله
الى محبي المفردة الشعبية
قصائدي

المقدمة...

بدأت بعدة مواهب في متوسطة الشرطة
منها النحت مع الاستاذ عبد الرزاق الكايم .
التمثيل مع الاستاذ المخرج عادل الكناني.
الموسيقى مع الاستاذ رشيد جاسم .
ولكن كان الشعر هو الأقرب الى نفسي وبدأ بتشجيعي
مدرس اللغة العربية الاستاذ عبد المنعم .
وكذلك تأثري بوالدي الشاعر ومدينتي التي يتواجد فيها
الشعراء عريان السيد خلف وكامل سوارى وفائق عبد
سعدون ورحيم الغالبي وآخرون فبدأت مع الشعر ومازلت
فهو عشقي.

وحاليا في الاعلام ولكن موهبتي الرئيسية هي الشعر.
انتميت الى جمعية الشعراء الشعبيين فرع ذي قار منذ
بداية تأسيسها وكان انتمائي في 1980/9/22 ساعدني
الانتماء الى صقل موهبتي من خلال الاماسي الاسبوعية
والمهرجانات وتواجدي بين شعراء كبار عشقت المفردة
الشعبية وكانت لاتفارقني حتى ببرامجي الاذاعية
والتلفزيونية اوضحها من خلال كتاباتي لسيناريوهات
برامجي .

الى شاعر

من تحجي الحقيقه
او تكشف المضموم
بس راد الرذيل السانك اتكضه
اريدك بعد اخوك
ابشطر واحد كون
تخلي اكبال عينه الشعر يتشضه
ملينه الترمز
والهمس بسكوت
اوياهو الماتمدحه اعليك مايرضه
مو هوو الشعر
موهبه امن الرحمن
ما جبته من واحد انتة متقرضه
خل شطر الشعر
سيف ابوجه شاريك
لان شعر الحقيقه
امن الحسام امضه
وانه ادري الغديد
اشما غزاك ابيوم
بس يوصل اكبالك ينتهي ابومضه
اكتب للرسول

واهل بيته اوياء
واشهر كل غلط لمن يجي ابو عضه
وشد جرح الوطن
واشهر اذياب البيه
مجروح الوطن ياهو اليجي ايعضه
صيح ابا على صوتك
وانصر المظلوم
واكبالك صور للظلم مكتضه
ا نته السان حال
اوصوت كل مظلوم
بيه باعو شرو فرهدو حتى ارضه
وانته اول فزع
للشفته يوم ابضيح
تسلهم عين غيرك عينك اليقضه
رد اهل النفاق
اواهل قيل اوقال
حتالة مجتمع ونفوسهم مرضه
عن كلشي غلط
بالك تهيد ابيوم
ولا فد يوم طرفك عنهم اتغضه
دفاع الفقره شعرك
بس بدون اتعاب
ولا ريدك تساوم عالشعر ترضه

لا تنظر الفرق العمر

لا تنظر
الفرق العمر
انه الأحبه مخوله
ايفرهد بقايه اسنيني..
جربني
شوف اشكد وفي
وابكثرما أوفي الك وافييني..
انه ادوخن
من اشوفك تبتسم
واغفه
اعله صوتك لمن اتحاجيني..
تستاحش
اصبحك شمع
اضوي ابوحشتك من بعد طفيني..
بس لا تضل
تلعب علي
لعب الجهل
مرعد اكلبيي اوصدك اياذيني..
حاجيني مو نظرات
صدكني العشك

اولا سر تراهو البينك اوما بيني..
وشربني
من ماي النبع
عطشان من جفك ردت ترويني..
ومن تعطش
انتہ ياترف
صدكني اشربك ياترف من عيني..
رايد انام
اعله الزند
اتلوليلي انتہ اوصوتك ايغفيني..
ومن اغفه
انه اعله الزند
او شعرك الناعم ياحلو ايغطيني..
يا شيب
يا فرق العمر
اوياهو اليكول انه اعبرت عشريني..
(كان له بيت وحببيه وابعد قسرا)

الى حبيبتي

لتصدين عني
وانه عمري اوياج
خلصته ماسي وانتي تدرينه
فاركت الاهل
واحملت برد اشتاي
وانتي اليوفي ابدأ ماتعوفينه
كالولج نحج
ادري كبلي اهواي
بس ياهو الصدك وياج شفتينه
من اربع جهات
افتر حراسه اعليج
حتى ابرغد ليلج من تنامينه
وخاف ايحوف غادر
تدنه نفسه اعليج
خاف ابماي شطج يمد جفينه
كصيت الجفوف
الكبل كربت ليح
وسيفي اندار حولج عرض حدينه

نتعاتب يشوكي
 اليوم انه اوياج
 واريد اذكر اوياج اسنين ماضيته
 حبي انه الج
 مو سنه لو سنتين
 من تاريخ زاهي ابيوم عشرينه
 ياهو الي وكفلج
 ساعة الشدات
 بيتج لمن شاف ابيوم غازينه
 واتمر السنين
 اوجعنه انه اوياج
 واحملنه الحصار اولوعة اسنينه
 وشح الماي عدنه
 وشطنه جف ابيوم
 واتفطر كلب طينة سواجينه
 ماعفتج ابيوم
 اولابعدت اعليج
 وضليته اعله درب البيه ماشينه
 بس هسه اشعجب
 كل هالتعب وياج
 برمشة عين كل هالتعب تنسينه
 ما ضني الغديد
 ايغازلج فد يوم

وانتي الغزل هذا اشلون ترصينه
شفته اوياج كاعد
صار صاحب بيت
ومن ماي الزلال انتي تشربينه
كولي ابياوجه
نتلاكه انه اوياج
باجر لو طفل منه ترضعينه
صاحب بيت انه
وصار هاي اسنين
بيتي ابيا شرع انتي تبيعينه
امهجر اسمي صار
اوافترا ولايات
واشكال الخلك تتصدق اعليه
دجله اتفيض دم
اوينخبط بالماي
من يبقه الغريب ابنص محارينه
اتواسه ابخيم
والبيت مو موجود
عيب اعله العرفها اورد يواسينه
ولا ريد البجه
واعترف بالمأساة
واتصدق عليه ابشكره واطحينه
متعود انا اعله

الضيم والمأساة
خل ياخذ الخيمه اوكل بطاطينه
لا بغداد عيدي
النضر بلي صار
واليسحك افراشج اكص رجليه
يا وسفه ابعمامج
ساكتين اشلون
ذليتي لجن شنهو المتانينه
ارد البيتي غصبن
والغريب ايزول
ماهمني السبات اونوم اهالينه
ماهمني السبات اونوم اهالينه

تفاح لبناني

اشوف اعله البعد
تفاح احمر طوخ..
وروحى اعله الطعم ملهوفه وتعانى...
الصبر فاض وتبدده
وروحى حنت لىك..
اشلون اتهدى روحى وطعم لبنانى...
احسك من بعد
طعمك لذىذ اهواى..
شافى الكل علل لو ضكته بلسانى...
يالمبعد عليه
اشلون بيه اشلون..
اخاف ايطول بعدى او يوم تنسانى...
شفتك من بعد
كلبى تعلق بىك..
وصورك لو شفتها اتهدى اشجانى...
مرات ابسائل
خاف تهجر يوم..
شو لحضة تسائل خطفت الوانى...
تعال اشلون بيه

الروح هامت بيك..
صدكني اعله بعدك كثرت احزاني...
بس عندي امل
لا بد اشوفك يوم..
وبسمع بأعلى صوتي القاصي والداني...
اصيح انه بحبك
يا حبيب الروح..
ياجنة حياتي او اعذب الحاني...
تعال..
تعال..
تعال اشلون بيه
الروح هامت بيك..
صدكني اعله بعدك كثرت احزاني...

ياربيعي

وينك ياربيعي

وزهوا الايام..

تعال وشوفني يابعد العيون...
لاسلهم جفن

بعدك ولا نام..

وصرت فرجه تراني لليكرهون...
علي وشر لسانه

العذل واللام..

وانه ابدنييتي ما الي كل عون...
بقو يمي

وحوش وناس ضلام..

كبل ما موت بعضامي ينهشون...
اوصلني بحياتي

يا بدر تام..

شلي بجيتك وي اليشيعون...
شيفيد الندم

للعض الالبهام..

وشيفيد البجي علي يموتون...
امشي اعليك

كل سيد بالاسلام..

وكل مؤمن صحيح امن يصلون...
تجيني اتشوفني

اشكد الك محتام..

اريد العيد اشوفه اوي اليعيدون...

يا وطنه

نتعب من اجلك وطنه

نتعب ومحله تعبته

اشما تعبته اشما سهرته

وتطول اسنين الدمار وبيها جعته

مايهمنه مايهمنه

بس يهمنه اثلون نوفي طبيك انه

يا يا يا وطنه

اشما جرى انه اشما يصير وكلشي صار

وخلها تتعدد اساليب الدمار

حبته ثابت مايغيرون المسار

ومن دروسك احنه نستلهم صبرته

يا يا يا وطنه

احنه حبيناك بالحب مانمیل
ومن کثر حبنه نهينه المستحيل
يا هو انه او ماینه او اطيّب خليل
ثابت الحب يبقه دوم ابنص کلبنه
يا يا يا وطنه

يلي من تمرك اكلنه
ويلي من نبعك شربنه
انت حبنه
انت املنه
يا وطنه انت جنه
يا يا يا وطنه

جرب صاحبك

ذر جرحك ملح
واصحه الغدر دنياك
او واكح كل وكح
والزغل مره اويك
جرب صاحبك
مو مره لا عشرين
واتمعن عدل
باليضحك ابملكاك
سن يضحك جذب
من تضحك انتة اوياه
خطوه لو مشيت
ايطعنك ابمكفاك
كل خطوه ابحذر
من تمشي فوك الكاع
امشيها ابتائي
اوريض ابممشاك
تدري الكاع وسعه

اوترفض الغافين
زمن قوه او غدر
قانون كل دنياك
صح طيب كلب
ساعدت زين اوشين
بس لمن طحت
بس كلي ياهو الجاك
لا تعتب تلوم
اوتندب اعله الراح
شيفيد العتب
واللوم بالخاناك
واهم لو تضل
تندب وره المجفين
بس كلي عليمن
صاحبك جافاك
لان انتة طحت
شافاك فارغ ايد
سمع منك ونين
اوماكو جلمة هاك
ضل عالج ابوحدك

لا تحشم الناس
كلمن همه روحه
اوياهو جاك انطاك
ربك بس يعينك
عالجرى والصار
لتضن غير ربك
هالوكت عاناك

من اشوفك

من اشوفك

ينفتح قلبي

واحس مثل الثلج يسري ابشراييني
واهيد

اوأهجع اوأرتاح

او تستعدل ابجيتك كل موازيني
وحقك

صدك انه اهواك

ميت بالهجر لو جيت تحييني
ضل بالراس

خيظ اوحيث

لا تلعب عليه ارجوك

مره اتجيبني ومره توديني
اذا تهجر

كطعت الخيظ

وبراسي تحول كل سواديني
بس ارجوك
انه ادخيل
شوفني الفرح مو راحن اسنيني
امشي عليك
كل شيبه اطلعت بالراس
اذا تكرب عليه انتة اوتحاجيني
مو عمو تكلي
انتة وتهدم الحيل
لا داده حبيبي
لو كلي حياتي من تحاجيني
كضيت العمر
كله وراك اركاض
واطلبك
تالي عمري اشويه وفييني
مو بسمار

وي لوحه اصير اوياك
لو كتلك هلو كلي هلو عيني

ادوخن لو كلت

صدك هلو عيني
وهويتي الاربعين

اتروح واصبح انه عشريني

واهجر

كل ليالي السود
واصيحن يالليالي السود اهجريني

اجاني

الي تريده الروح

او بالسنتيم

تنقاس المسافه بينها اوبيني

عشك شاعر

رغم صوت الرصاص
اوريحة البارود
ما مر ابسيات العشك لا سلهم
سهر جفن الحبيبه
اعله الحبيب الليل
وبدم جرح من تهواه تتوسم
اهوايه الي حسب
حبنه يذله الضيم
ضن وخاب ضنه او غلط وتوهم
وفاته ايزود
كلما زادت الالهات
ويضل شوف الحبيبه للجرح بلسم
اشجم عنثرو عبله
بالعراق اهواي
واشجم عاشك
ومعشوك بالحب بالوفه ينعم
مصادر للوفه والطيب
كلمن مايعرف ايحب
من ادروسنه لونهل يتعلم
عشكنه مو عشك غربي

عشك مستور
 نحترمه ونقدسه نضحى اله بالدم
 قصايدنه الغزل
 ما فاركتنه ابيوم
 رغم طعم الليالي الممرت العلكم
 وتضل ريحة ازلوفك
 طيبتي ابكل داي
 بس اكر ب عليج ابيوم بيها اشم
 واذا علني
 الوكت فد يوم
 انتي اشفاي
 بس اشم عبيرك لحضه لو نسـم
 احبيبه اشما حلك
 صدكيني وكتي اويـاي
 والليل اليمرني اشما يضل اضلم
 ابد فاركني رسمك يوم
 واضل برجـاج
 ما انسـاج
 صدكيني اكضي الليل بيج احلم
 خافض للحراره
 اوجنه كمادات
 لو لامس اجفوفي جفج او سلم
 اوتدور الكاع بيه

لونظرت العين
واشوفن جفنج النعسان لو سلهم
يا عسل الشمال
اوبرحي البذي قار
يا ازید حلاوه ریجج او اطعم
شعرج لواوصفه
صدکینی احتار
من خیط البریسم اترف او أنعم
یم اخدید راوی
واحمر الرمان
بیه او بالشفایف یجری بس الدم
یلوک الوجهک
اوما غیره
بعد ایلوک یبعد الروح هالکلثم
اتیهن لوحجیتی اویای
واذوبن لو شدیتی ابصوتج اورنم
شاعر والعشک
حد اللحد ویای
ماهمنی العمر لو زاد واتقدم
انه اویاج حد الموت
لو فرق العمر سبعین بیج اوداعتج مغرم

سيف اللحظ

عوف الشعر

ذب ايدك اعله ايدي شمر

خل تستعر

نار العشك

روحي وي روحك تستعر

ياهيل ياريحة مسج

خليني اشتم بالعطر

دايخ ابحسنك ياترف

ضوكني من طعم الثغر

خليني

اكضي اويك تالية العمر

احجيلي يالحجيك نغم

موزون يالحجيك شعر

راويني طولك ياحلو

خل ايدي تلتف عالخصر

يالدملك التم بالوجه

بالشفه بالخد محتصر

يا فارس

ابسيف اللحظ

سلمت وانت المنتصر

تکلي افرح

تکلي افرح
وانا ساعه الوکت

وياي ما ينصح
دواليب الهوى
صارن يصاح اعضاي
بيها اهموم كل دنياي تتمرجج
لفاني الما لفة للناس
وبدمي العزيز الداي طب يسبح
مو کثرن اجرودي
اوخنيبن خنياب
ما بطل وکتنه ارداف ضل يجرح
خليني ابحزن
ضکني الدمار اهواي
جا شنهو الفرح کلي الخبز لو شح
من دم ولحم
تدري يصاح اعضاي
مو رمل او حصو وبشيش ومسلح
يوميه اموتن

لو شفت طفلي
كلب عينه الصبح من جوعته اوسنح
خل الفرخ الهم
لليكضي الليل
يركص للصبح ما فارك المسرح
خل الفرخ الهم
للشرو عرض الناس
من دم الغلابه البالغدر يسفح
خل الفرخ الهم
للهورى الفرهود
وبدم اليتامه ايبيع بس يربح
من تترس
اجيوبه اليوم
باجر خنجره المسموم وجهه الياكتر يذبح
خل الفرخ الهم
للهورى التسليب
والتسليب رسمي اوواكف امشاح
ويوميه اشوفن
عامل التسليب
واكف ياخلك مهيوب ومساح
يجر خبزة فقير
اكبال عين الناس
ياخذها غصب من عامل اليكدح

وين اتغرب الياصوب
لجان اموزعه اكل صوب
رسمي اوشبه رسمي ابديك اموزع
خليني ابزن
خليني اضل مجروح
خليني ابعلكم من المامش اتجرع
ما اسلك دربهم
انه حتى ارتاح
ولا غرني لحم غزلان حتى اويهم اتربع
سن ذيب الدمار
او ادري جاس اعضاي
خل ينهش ابعضمي اوباللحم يشلع
خل جور الدمار
ايجيس كل اعضاي
خل يصفه الجسم لامراضهم مرتع
ما اسلك
دربهم يوم يوم اوللغلط اخضع
رغم كل اللفاني
او جور وكتي اويي
بس لله الكريم الخلق انه اخضع
خليني ابزن
لتكلي بعد ارجوك
جا وين الفرح وتكلي انتة افرح

خليني ابزن
لتكلي بعد ارجوك
ماريد الفرح ماريد بيه افلح

عسل

يا عسل الشمال
وياحلاة البيك
يا ورد الحدايق يانع ويلتم
تفوح اعطور منك
واليصلها ايطيب
يشفى من العلل لحظات بس يشتتم
جمال البالورد
غازل جمال البيك
سبحانه الخلق وابهاالجمال انعم
صوتك بس سلام
اتذوب كل اعضاي
اذا طال الحديث اشلون ما اسلم
من تحجي همس
جنه لحن زرياب
تطرب روي ليه وللجرح بلسم
ادمنت اعله صوتك
اسمعه ابكل يوم

واصبح ابعالي صوتي الله لو تسلم
واضن لوما سمعتك
لو بعدت ابيوم
واضح لو اجن لو موتي يتحتم
واضل ليلي ونهاري
انتظر بس ملكاك
وكل لحظه التمرني بدونك اتالم
مو عشره طويله
بس قليله ايام
لكن ليلي صرتي وقيس انا المغرم
يا اعذب نبع
يروي فقط رشفات
اضن بس خالقك يا عيني بي يعلم
عينك من تصد
اعرف اشراح اتكول
وكبل نطقة لسانك صرت بيها افهم
اول ماشفت
صدكي جمال العين
وسيعه امكحله شو كمت بيها احلم
ومثل قالب

ثلج بارد احسه ايدوب
جسمي ايدوب كله ابصوتك الرنم
كثر عندك مواهب
جمعها الله
مثل كثرة جمالك والبعد يندم
يا اية حسن
محروسه بالرحمن
اخاف ايطول بعدك قلبي يتحطم
ياريم البراري
اشورطاني اويك
لوضال اعله بعدي
وباقي بيك احلم
شفتك يوم واحد
تيهيت الروح
اذا اشوفك حقيقه الله بيه اعلم

تعال

دوس
فوك اجر وحي
واتمشه بدلال
كامل ابعيني يغالي
ولو بس لله الكمال
انته من توصل اليه
اعذبي يا نسمة شمال
مرني صار ايام اتاني
انتظر جيتك تعال
ضامي وانتظرك تجيني
مرني ضوكني الزلال
تعال تعال
تعال موش بس جبدي
مردته
من كثر ما رددت كلمة تعال؟؟؟

هدني

مو تدري
البدن متعوب
منك يالصرت وياي مثل الضل
فك مني حديدك
سايم الله اعليك
فك مني الحديد او حل
ثلث ترباع
عمري خلصيته اوياء
ضل ربع الاخير وبعد مايحمل
ما مره انكسر
كلبك او انتة اتشوف
هاي اسنين دمعة عيني من اتهل
هدني اشوهدناني
اوياء ماريد العمر وياك
ما ريدك حبيب وما اريدك خل
كضيت المضن
من عمري انه اوياء

لوعه وعشرتك تكتل
بس كافي
صفيت انه ابحماده اويك
وانته البيهها جنك صل
يالكلك غلط
لا عدل لا انصاف
ماكو انصاف عندك لا عدل تعدل
هدني انسان انه
وانته موش انسان
وشيوخ الغواني اخيولهم تصهل
رافكهم ولك
ماريد عشره اويك
فك مظلوم عندك تك رجل يكرل
اشتبي من اليكالب
بالمنايا امكالب اكل يوم
جايب حادلاتك بالعضم تحدل
هدني اشتبي
مني بس بقه النكاد
مادام النفس بس يصعد اوينزل
خليني اعيش

الباقى من عمري
خيٲ العمر بيدك وانتة بيه تفتل
حل خيٲ العمر
لا تكثر العكدات
نوبه اتشده بيدك نوبه بيه اتفل
يالصار العمر
بيدك شبيه الصوف
تنفش بيه مره ومره بيه تغزل
خاف الله
ولك لا تالم المالموم
عليته اشكتر بس كافي بيه اتعل
كل جسمي انزرع
بجروح فوك اجروح
وين ابياكتر رايد بعد تشتل
مو عدهم اسمان
اودمهم ايكفيك
وانته استاذ كدها لو ردت تخزل
شابح عينك
الياحد اعله المالموم
لا يوم اتهجع لا يوم بيه اتجل

وين الشرده
منك خايب الياصوب
وانته ابكل زوايا شو كمت تختل
ضلمه ايام
عمري خلصتها اويك
حارمني الكمر ما شوفه من يهل
تجلبية

زغیر السن

اجلبنك یلیلی 12 تجلیبـــــــــــــــــه
اعله کلبی الورطانی وذبنی بمصــــــــیبه

کلبی ورطانی وی زغیر ســــــــــــن
انهی الروح عنها وهــــــــــــوه لیها ایحن
عکلی امن الکلب یانــــــــــــاس راح ایجن
ومن لوعة اکلیبی الــــــــــــراس طش شیبه
اجلبنك یلیلی 12 تجلیبـــــــــــــــــه
اعله کلبی الورطانی وذبنی بمصــــــــیبه

اجلبنك یلیلی واه فــــــــــــــــوک الاه
خبرونی ابدلیلی شعمل انــــــــــــــــه اویاه
عدل یمشی اریده ویعکس ابممشــــــــــــاه
تعبنی وطحت مکدر مطالــــــــــــــــیبه
اجلبنك یلیلی 12 تجلیبـــــــــــــــــه
اعله کلبی الورطانی وذبنی بمصــــــــیبه

بس من العــــــــشك كتله ولك كافي
بيه امن العــــــــشك مو جرح بس خافي
وتنور العــــــــشــــــــك بالكلب مو طافي
وكضاني الســــــــهر والله وزاد تعذيبه
اجلبنك يليلي 12 تجليبــه
اعله كلبي الورطاني وذبني بمصــبه

كضاني السهر والله وتعبــت اعيوني
شسوي الكلبي رايدكم ترشــدونني
اصير اوياه لو ضده تنصــحوني
هايم بالعشك بعده ابملاعيــبه
اجلبنك يليلي 12 تجليبــبه
اعله كلبي الورطاني وذبني بمصــبه

الميمر

يابو الجدايل

يابو الجدايل عالمتن ياباني
بيت المـــــوده والبنا ياباني
كلبي اعله دربك ياتـــــرف ياباني
لنك وفي اوطيب اوخلو المعـــــشر
عالميمر وعالميمر وعالميمـــــر
عشك الجدايل نص دليلي خـــــضر

يابو الجدايل عالمتن بـــــس حلها
وروح الوصالك لوهوت بـــــس حلها
مشكله عندي وجاي الك بـــــس حلها
ولتخلي صـــــبري ياوفي يتحير
عالميمر وعالميمـــــر وعالميمر
عشك الجدايل نص دليلي خـــــضر

يا بو الجدايل عالمتن مر مرنه
وعشكك تراهو ابهالزمـن مرمرنه
اعضاي كالت عالكلـب مر مرنه
ما حسبت ابهجر ك تره يتفسـر
عالميمر وعالميمر وعالميمـر
عشك الجدايل نص دليلي خـضر

يا بو الجدايل عالمتـن سامرنه
ابليله ونسمعك ياحلو سامـرنه
منهو الاسئله ايرد علي اسـا مرنه
وانه اعله شوفك ليش ضال اتحسـر
عالميمر وعالميمر وعالميمـر
عشك الجدايل نص دليلي خـضر

يا بو الجدايل عالمتـن صافينه
واذكر لمن جان الوفه صـافينه
ياس وشمع بصواني الك صافيـنه
ننتظر جيتك للـدرب نتفكر
عالميمر وعالميمر وعالميمـر
عشك الجدايل نص دليلي خـضر

امناطرك

ساعه ساعه
اويوم يوم
عمري تدري امناطرك
واحملت
حجبي الملامه
والله كلها الخاطرك
ليش تالي
ابهجرك اتجازيني
وتنسه كل ذاك
التعب ياعيني
دين اطلبك
هسه اريدن ديني
رد حبيبي رد نريد انباصرك
ساعه ساعه
اويوم يوم
عمري تدري امناطرك
واحملت حجبي الملامه
والله كلها الخاطرك

تذكرني تصاويرك
على العشره ولياليها
غريبه الروح وتريدك
يغايب بس تمر بيها
تسألني عليك الناس
ياما ناس تسألني
شجاوب شعتذر كلي
اكل للناس هاجرني
الناس معروفه ابوجهها
وانته محد حازرك
ساعه ساعه
اويوم يوم
عمري تدري امناطرك
واحملت حجي الملامه
والله كلها الخاطرك

انه خلصت الليالي
سهر ودموع اعله مودك
وانته توعدني وتبالغ
والله غرتني وعودك
ومرت ايام وليالي
انتظر واحلم واساهر
انتظر لمة شملنه

او عايش اعله او عود باجر
يا الجرح بالروح هجر
انه هم مره يغالي جارحك
ساعه ساعه
اويوم يوم
عمري تدري امنطرك
واحملت حجبي الملامه
والله كلها خاطر

ليه ماتحن

يالذوبت
شعري انا
ابنص دمك انت ومنعجن
مركب صفه
شوكي انا
وطراده شوكتك
ما يلحك بالسفن
ياما حجت
عنك لسن
بس شعري بالمرصاد
سجين ويكطع بالسن
يا بو الحسن
كل شعري انه العاطفي
باسمك كتب اعذب لحن
ليه ما تحن ليه ماتحن
يابو الحسن
تخدر جنت
يوم انتلاكه احنه سوه
وراسك تحطه اعله المتن
ياما نمت

فوك الزند
و غطيتك ابضل الجفن
ليه ماتحن
من يوم هجرك ياترف
صدكني ما شفت الوسن
اسمي طليق
ابدني تي
بس دني تي ابهرك سجن
ليه ماتحن
ليه ماتحن

شربت زيب

صادفني
اهوايه كبلج
وكالن انموت اعله حبك
وانه من المستحه هم كلت اموت
ثاني يوم الكه التحني
ايطخ زندها ابزند غيري
ابكل وكاحه
اكبال عيني والله صدكيني تفوت
وياثكل صدمه التجيني
استنجد ابكل الايمه
وحشمت حتى النبي البلعته الحوت
وياما ياما اشكد شفت
وياما ياما اشكد عفت
ومن غدرهن ايست
كلمن اتكلي احبك
وما الي ابها لدنيه بس انت الحبيب
كمت من تحجي الصبح
البس حبيها
وانسه
كل عشك الجذب وكنت المغيب

وجيتي انتي
وشفت حجب
بيه طعم
امثلج ابتموز يروي والطعم شربت زبيب
وجيتي انتي ورنميتي
ونزلت الترنيمة بذني مثل صوت الغدليب
وفرزنت بين الاجن
كبلج او انتي
شو شفت
جرحي الي منهن من تلاكيني يطيب
وشفتج اتوافيني
كلما وعدتي
وكمت احس
كلبي ابنظرتج
بس الج وحدج يحن ويستجيب
وجنت اشوفج بالوفه
انتي الوفيه
وبالوفه اتعديتي انتي
والله صدكيني الصحيب
وحرس جنتيلي ابودادج
اشما امر ياخذ تحيه
من طلوع الفجر ولحد المغيب

مناي انتہ

فوك اعله الجبل
وانه بسفح مطروح
سهم لحضك رماني وذبني بسفوحه
خل عينك عليه
ومدلي حبل انقاذ
تصد عيني عليك وروحي مجروحه
كلبي الضيعةك
عاف الضواحي اوجاك
عليك اينوح كلبي وياثكل نوحه
حمام الروشه شافه
واكثر ابירות
وشاف اشكد حمام اعله البحر دوحه
ماهمه الحمام
البيها يزهي الوان
بقت عينه عليكم عينه مشبوحه
لامت مره روجي
الكلب بطل هيد
مو عالي الجبل وبعيد شيلوحه
رد النبض عندك
شوفي دكه اشلون

مو خافي عليك ودكه مفضوحه
صح كالت الروح
وشوكي انه اويك
انه ازيد هويته اوسري مابوحه
فوك اعله الجبل
وانه بسفح مطروح
سهم لحضك رماني وذبني بسفوحه
خل عينك عليه
ومدلي حبل انقاذ
تصد عيني عليك وروحي مجروحه

لا تبتعد

لا تبتعد
عني اوتصد
يلي عليك اتعودت
عمري ابخريف انه انكضه
ومن شفت شخصك وردت
وعيناك والواحد احد
لجروحي بس انتة الضمد
لو تبتعد
شلي بعد وانه فلا غيرك ردت

عن كلب يوفي دورت
وبدوارتي كلها اخسرت
اشهد صحيح اتصيدت
بس عمري مثلك ما صدت
، عندي امل انتة الامل
وبجيتك كلشي سهل
اهلال انتة الي
واعليه هل
وكلما اشوفك عيدت

علمني

علمني
اشلون انسه العشره
وفهمني اشلون انه انساك
ودليني
الياصوب اتعنه
لو ما رايدني اتعناك
وكلي
اشلون اتسلهم عيني
واشلون اكضيها ابفركاك
رد
يالرايد تبعد عني
لا تبعد عني اترجاك
كلب الحبك
ياهو ايكضه
لو واحد يذكر طرواك
غيرك
شلي ابهاي الدنيه
وشلك غيري انتة بدنياك
جنت انتة

التغفه اعله ايمني
يالرايد تهجرني اشجاك
من دوني
اشلون اتعيش انتة
ولا عيشن انه بلياك
ترضه
اتجازي ارباي ابهجرك
لا لاتجرح قلبي الرباك
كالو
محبوبك حب ثاني
ما عفتك ضليت اهواك
وكالو
محبوبك ما رايد
لاحبك لا عيشه اويك
ما صدكت
الواشي او عينك
هذا انه اوضليت اهواك

القصيده عن لسان حال احد الاصدقاء الذي حدثت معه قصه حقيقيه وعندما احسست بمعاناته وحزنه حيث كان يحلم ان يلتقي بمن احبها بعد انتظار طويل وكان سعيدا عندما اخبرته احدى صديقاتها بانهم سيلتقيا يوم الخميس وسيتم اخباره قبل يوم بمكان اللقاء ولكن مر يوم الاربعاء والخميس ليأتي يوم الجمعة يشرح ماجرى له... فكتبت له هذه القصيده...

انتظرتك

انتظرتك

يوم..يوم

او احسب الملكاك

وانته اقرب شخص عالفركه واساني...

كتلك عالبعد

كلبي تعلق بيك

واذا ضليت مبعد كثرت احزاني...

كتلي اصبر

يرويحي والفرج موجود

واذا مقسوم انه ابيوم تلكاني...

خاويت الصبر

حد ما صحت احاه
كبر جرحي وكتلتك جرحي اذاني...
وسمعت ابونتي
وكتلي اصبر اشجم يوم
وحسبتك الي تشتاك وتعاني...
وانطيتك وعد
راح اصبر اعله الاله
بس اوعدني كتلك خاف تنساني...
وكتبنه احنه عهد
تذكره كلش زين
لسانك مو نطقها أ و أيد الساني...
واجه يوم اللقاء
الي اشوفك بيه
بس كبل اللقاء انخطفت الواني...
لان جان العهد
تخبرني كبل ابيوم
انتظر قاضي الغرام ابصوته ناداني...
بس عزلت كلها
وسدت الابواب
وقشمرت اعله روعي الشوفك امتاني...

عرفنه احنه الخميس
الناس تفرح بيه
بس انه افرحت بجروحي عدواني...
لكن رغم صبري
والجرى والصار
اذا هجرك سعادته وجنت انه احلم...
خل اجروري تكثر
واحمل انه الاله
بس كون الهويته بالفرح ينعم...
كتلك صيف وكتي
واحلم ابملكاك
واعذبي احس الوصل لو نسّم...
بس دنيانه تغدر
راضي بالمقسوم
وخل غيري بعبيرك يسعد ويشتم...

محطات

باول محطه امن العشك
بين الورد مشيتني
وثاني محطه ياترف
ابلايه سبب مليتني
محطات العشك كثره
وهذه اول بدايتها
اتجاهي اشيصبح احساسك
من نوصل نهايتها
محتار بامرك ياترف
محتار شو خليتني
باول محطه امن العشك
بين الورد مشيتني
وثاني محطه ياترف
ابلايه سبب مليتني

عهدي اويك انا مصيون
وانته اخلفت ميعادك
وين الوفه وين الطيب
وينك انته ووداك

وانه الي حسبت احساب
طول العمر صافيتني

باول محطه امن العشك
بين الورد مشيتني
وثاني محطه ياترف
ابلايه سبب مليتني

درب العشك تدري اطويل
واهوايه محطاته
بيه ايخون بيه ايصون
تبقة كلمن وذاته
يلي اريد امسرتك
ليش انتة ما سريرتي

باول محطه امن العشك
بين الورد مشيتني
وثاني محطه ياترف
ابلايه سبب مليتني

العید هذا

العید هذا
وجرح فرکاکم
تره اصبح غمیج
یالبعدتو ابعدتو عنه
وین حطیتو
اونزلتو ابیا فریج
مو سألت
اهوایه عنکم
والله اکثر من صدیج
کالو اهواک التحبه
بحرما بینک لبینه
والبحر کلش غمیج
انسہ احسن یالهُویت
وحاول اتخلي دلیک ما یهیج
صحبه هاذي
موش بس انتہ اخسرتها
خسروا اویاک
ابوطنه ابکد نفوس اهل الخلیج

نبرالكم

نبرالكم
ويوصل
خيالي اويك
حد نكل الجدم
يبرالكم ونذوب
نصفه ابلا وعي
حتى
اعله صوت التحدثه خطواتكم
ونيالكم
هنيا لكم
يهل الترف
صبح ومسه
تشوفوه الف هنيا لكم
تزوروني
مرات بحلم
واشهك
واشمكم بالحلم
ولصدري اضم اخياكم
نبرالكم

اكحيله

يا عيون
الما لها ابدًا مثيل
ويا زلوف الغافيه حدر الحبر...
ويا طعم
بلسانها يشفي العليل
ويا خديد الراوي تفاح او حمر...
ويا رضاب
البالحك جالس لسبيل
بس ترشفه اتطيب ترتاح اتخدر...
ويا شفايف
عامره ابريحه الهيل
حك دليلي ايهيج صدك ما صبر...
ويا عنك
غرنوك ركبتها تميل
من نسيم الهاب تتحسب خطر...
ويا صدر
مثل الجبل وابلا دليل
اتيه بسفوحه تره اومالك خبر...

وينك انتہ

ماني اليصاحب دغش
ولغايه ويخون بصحبته...
ولاني اليخون العهد
لو وي بشر عهدي كطعته...
يلي سهمك بالكلب
بجلالي سدده او شجخته...
يلي فوك اجرودي
جرحك فوك ضيم الوكت ضفته...
يلي سري اويك
بين اجناب ياغالي فضحته...
وانه سرك بالحفظ
والصون بكليبي حفظته...
يالضكت حنضل عذابك
وانته مني العسل ضكته...
يالسلبت العكل مني
ولك غفله واخذته...
يلي حتى النوم

من عيني ترى ابهجرك سركته...
يالزالل الماي من
نبعي جنت ضامي وشربته...
ومن رويت اترد
تذب احجار بلكي انتة خبطته...
يالجرعت الصبر لجلك
ليش ما همك ابد صبري الصبرته...
ياحسافه الي عمل
وياك طيب ابساع كل طيبه نكرته...
ولا سألت عليه مره
وين صار اهواي لا مره ذكرته...
وانه ذاك انه
بعدني اهواك ذاك الي عرفته...
ما تغير كلبي من عندك
رغم كلما جرى وكلما عملته...
وعالبعد كلبي يعاتب
وينك انتة
وينك انتة
يالعلی مودك
انا الصبير ياغالي جرعتة...

يا لعللى مودك
ربيع الجان كدامى خسرتة...
وينك انتة
وين تعبى اوياء والليل السهرتة...
وين كل ذاك الحلف انتة الحلفتة..
وين شعري اعليك كل ذاك الحفظتة...
وينك انتة
الناس شتكلك لون ولفك هجرتة...
وينك انتة وينك انتة
وينك انتة...

عطش

بعيده انتي
وبعيد انه
يا يوم الهنا ويا يوم ملكانه...
عطش
وبنص شهر تموز
عليك الروح عطشانه...
نهاري
اكضيه يحبيبه
ابسكم وعيون حزنانه...
وانظر
مرت العشاق
اثنين اثنين فرحانه...
واشوفن
عاشك ومعشوك
ابنعيم العشك نشوانه...
على جرف الفرات

الأيد تمسك ايد
وبنشوة الحب اصبحت سكرانه...
وانا كلبي
سفينه ابروج ما بيهاش سفانه...
واكضي الليل
دمع او ويل
حزن والروح تعبانه...
ويمر ليلي
ضلام امخيف متهمه خطايانه...
واضل
استنجد بدنيائي
كافي ضيم دنيانه...
يدنيه مروتج حني لتطولين فركانه...
مثل شريان كلبي اهواي
ومنهو الي يعيش ابغير شريانه؟؟؟...

اجيت الداركم

اجيت الدارك ابلهفه..
اجيتك الجروح اهواي..
واجروح التضدني بشوفتك تشفه..
اجيتك..والعيون امساهرات الليل
بلكي ابداركم تغفه..
اجيتك ضيف بس يا حيف
ما صحي ونيني الغاليه الترفه..
يغالي امشرغد اونايام دشوف الحبك وهايما
جريح اباباكم..بس محد ايسعفه..
اعله عتبة بابكم
ترضه اكضي الليل
والموسم شته يازين بيش ادفه..
غريب انه ابطرفكم
ونين الروح مابطل
ولا هاد الدليل ولا بطل نزفه..

بيك مغرم

جنت كبلك
شايلى احزاني واعاني
الليل والاهات والهه
ومن عرفتك
كبرت ابعيني الاماني
وكل جرح
عندي كبر شو كام يلتم
وين نلكه
وين نلكه ابهالوكت
واحد حنين او بيبك يهتتم
امعدل انتة
وكل معانيك حليوه
اشلون
لو شافك شخص مابيك يغرم
ياخميلة رازقي
والله يحتار اليصلها امنين يشتم
طيبتك عطر الخمايل

بيها انواع الورد البيهة نعلم
ريم انت
والي شافك بالفلا وماصاد يندم
جنت احلم
بيك احلم
شوكعد حضي ولكيتك
اوصلت الحد النبض
عدنا تساوى
بالكلب بالروح بالدم
مهلك انت
وين نلكه ابهالوكت
واحد حنين وبيك يههم

اشترك

اشترك

حتى لوجان الطلب

عيني بعد عيني اشترك

واعتنيك

اشمابعد درب الوصل

اسحك اعله الروح حيل او اعتنيك

واشتهيك

مثل العذبي

ابضهاري الصيف تدري من اعتنيك

اشترك ..واعتنيك..واشتهيك

لكن اشبيدي اعله وكتي

انه ماطايح بديه

وانت ما طايح بديك

انت فرحي وانت جرحي

ردي ارجوج الحياتي

بعدما

كلبي تغلك بيك

وانت يحبيبته اعله كلبي اتعوديتي

وبعد ما

صرنه فرد روحين

وي نبض الكلب بالدم سريتني

وبعد ما

عيني اسهرت ايام

وانت اكثر مني ياما ساهريتني

وبعد ما

ناطرت جيتج يحلوه

وانت اكثر مني ياما ناظرיתי
ياشرع
يقبل عذابي
لو خطب غيري يحلوه وبه رضيتي
يا كلب منه ايتحمل
لو تلاكينه ابدر
وانت موش اويائي وي غيري مشيتي
موش معذوره
لون كلتيلي قسمه
ومني يا حلوه اخاف اتعذريت
لا وحك
قصة عشكنه
لو هجرتيني ابد
والله من شوكي وعذابي انت بريتي
ردي ارجوج الحياتي

وانت بحزاني الوحيد الشايطيتي
ردي خل اغفه اعله جفج
واذكري ياما على اجفوفي غفيتي
انت فرحي
وانت جرحي
وانت كلشي بدنيتي احبيبه صفيتي
ما اذن تهوين بعدي
وما اذن تهوين بفراكي اذيتي
بس اذكرك
خاف كلشي ايصير يحبيبه ونسيتي
بعدي عنج
هو بعدي
والله من دنياي ويكرب منيتي

بعدي

خبز اكل بعدي
واشرب انا الجاي
وبعدي اشرب جكاير بيها فلتر...
بس خوفي
اعله وكتي الغادر الجاي
حتى بالقطار ايصير بنجر...
على جالي اصبينه
اوزايد الماي
وعله الصلبيه يخوي اذياب تفتر...
ابجي من الهموم
وبجيبني بهداي
ولو جرح الوكت ياخوي يكبر...
واكضي الليل ون
او للصبح حاي
واسكت من اشوف الفجر ينطر...
خوفي من الشماته

وفرجة اعداي
واضحك والله بحشاي يسعر...
عليل احبي حبي
من شحة ادواي
ولو مرني الشمت انكلب عنتر...
لعب لعبات وكتي
ابخبث وياي
كل جوله اللعبها وياي يخسر...
اون انه الجبير
بشحة اغذاي
على جوعه الزغير اشلون يكدر...
بجه طفلي واضحكه
اويضحك اوياي
وعلى بجي الطفل كلبني تفطر...

صير زلمة

اعليك لو حمل الوكت زاد او ثكل
صير زلمة وشيمة الزلمة ثبات...
هذا يافوخي تره اوفوكه نكل
من طلايب دنييتي والنايبات...
بالصبر ياخوي عيش اوبالعكل
وأخذ عبرة ا بكل درس من الحياة...
ليل ونهار الوكت مابي عطل
لمن يدلن ياعزيزي التايهات...
وياك وكتك لو جسى ومنكر عمل
انسه واتلكه يخوي الجايات...
جم نزيه المن غدر وكته انطحل
لنه ماطاك الصبر تاليها مات...
ابعينك اتشوف الوكت صار اصطبيل

والي يفترن يريت امربطات...
مامش احساب الزكط والي نطل
ماكو قانون اليداري الطايحات...
بالعزر والضيم لو عمر ك تضل
كول من ربي هذني امكدرات...
اتهزلت دشداشتي وصارت سمل
حضي صيف اشته تره دومه ابسبات...
لكن اشبيدي اعله وكتي اشما حمل
من اشوف الدنيه صارت طرهات...
والله لو غيري تره ابيومه انثول
لو لفنه اهموم وكته امسرجلات...
اهوايه وادم عدنه ميوتها بصل
لكن الميوه الصدك للزانيات...
الي زاح الغيرة منه وماخجل
هالوكت جلماته هن الماشيات...

ولاتلوم الصاحب اويك الزغل
وادم اونكرت حليب الامهات...

زهيريات

صديت وابلا ذنب عني دكلي اشجره
برعم شتلتك انا واكبرت صرت اشجره
وابرمت خيط الوصل من عته شنهو اشجره
نمام شامت يخي بيني لبينك صــــار
وانه السنين المضت سرك ابكلي صار
لو صدك ناوي الهجر واعله الجفه خي صار
ارماد جبدي تره بس هاك اخذه اشجره

يا صاح والله الوكت اسيوف الغدر سالها
مرات طكني اوردف ودماي انا سالها
دملّ اجروحي تره اوروحي يخي سالها
يايوم كلي يعف لو كبر سني اوشاب
لوعني وانه طفل صدكني والله اوشاب
جانونه باخر ضلع موجر اعضاي اوشاب
واحرمني نكلة جدم كاع الله خي سالها

بجلىكه انه ابحرت والناس ركبت سفن
وسابت حيايه البحر وياي بيها سـفن
وانه ابطبرته الوكت مو سيف اطبك سفن
مدري التهي ابطبرتي لـوالتهي ابلمي انا
خايف احشم ربع خـاف اليجي بالمنا
تايه ابنص البحر وناس ابفرح بالمنا
متخومه تلج علج والله اوتـدور سفن

راكـد يخـوي اوطحـت ما بعد اكرـد سـفر
والوجه من ضيمهم بان ابشـحوبه سـفر
كلبي صريفة كبل من عره بيها سـفر
بس اشيفيد السفر من بقه بيها اهـطـار
امجده اعضاي اصبحت من زاد وكتي اهـطـار
حتى الاحبه بعد من شاف اهي طـار
وجوني الشماته ابعصي ايكولون طالع سفر

ياصاح تدري الوفه والطيب ماهو امر
لوردت تعتب عليّ واتريد مني امر
من حالي ماضن اجد بالدنيه واحد امر
لني ابهذا الوكت ادروبي اصبحت وحله
اوفوكاها ضيم الاخو بيه مبتلش واحله
جاتو اصحابي كبل ابلذ العسل واحله
لكن هالايام حنضل طعمهم وامر

يا صاح والله الوكت سجينه لمة اوشره
واكل امشجن عليّ غدره يخوي اوشره
بطران كلمن عتب يعتب عليه اوشره
مادره ابكيش اشلعت واكبالي عجلة فال
شيفيد كلي اشتضن ينفعني قارئ فال
شابكني وكتي ابزن مايوم صدك فال
انهي اللحم والجلد بعضامي باع اوشره

يالما زرت حيكم صــــــــارالي مدة شهر
كلما نويت الوكت ابوجهي ســــــــلاحه شهر
امكابل اليمشي عدل ويا ما ابشخصه شهر
واليمشي مكلوب تدرون الوكت راضي اله
لوشاف ماله كثر هــــــــود اله راضله
ولو راد دم الفكر مصه اوسكه روض اله
وانه من ضيمه صحت احاه يردلي شهر

يافلس لا لا تنس عني اوتمر بسكــــــــوت
ما اريد اصبح ثري منك ولك بس كــــــــوت
لاني بزر نستله ولا من بزر بسكــــــــوت
نيشاني رجلي تضل لــــــــســــــــاع بيها فطر
ابخبزة شعير الابو رمضان صــــــــامه فطر
ماهي جديده علي بالفــــــــكر اعيشن فطر
الون صبح سلوى الي وراحه الدمع بس كت

شو ناس مو بس قـ صر كامت تره تبـه
 اوكلها وكتي عسل والـه الـ وكت تبـه
 ضامو فقير او شفت اصـ فوف لهم تبـه
 واتصيح الحـك لهم للـ اعـ ملو منـر
 بوفلوس شفته يرب بلوز الفـ قـر منـر
 ادريك بالاخره اتعذبـه تره منـر
 لاجن نريد الطغى اكبال البشـر ر تبـه

المابين طرکات الضلوع امجانـه هوـه اوحدـه
 ابلايه وداع ابضعن شـد الرحيل اوحدـه
 حـكه الشمت لو شهر سيفـه عليـه اوحدـه
 من شاف اقرب شـخص راح ابتعد عني
 ياربي عطفـك علي وبمحنتي عني
 لا اخو ينـغر الي تدري يـضـل عني
 والواحد ابـهالوكت يـاهو يـجيـه اوحدـه

أبوذيات

لون تهجر اضــــل انه ويامن
ودليلي ما هوى الغيــــرك ويامن
يامن انتـه الي سلــــوى ويامن
صرت روي اوحياتي اوكلشي اليه

متى ضيف الهواك ابيــــوم حليت
اوبيدك عكدت الشــــريان حليت
مر زادي لجن لو جيــــت حليت
زادي اوعيشــــتي تبقه هنيه

الما سنهـا البشــــر كـبـلي لسنهـا
اذا ما كفت الوادم لسنهــــها
طربت النار عشكي انه لسنهــــها
السنا برد او سلام ايصير اليهــــه

لعب جوله ابدليلي كيـــــف ماراد
عـبـنه اخو وروحـــــي اله ماراد
ارشده انه الطريج العـــــدل ماراد
هجرني واشتمر وادنـــــف عليه

هجرني واشتمر والنـــــبع بيه بز
وغدر من عاشره ابمكـــــفاه بي بز
نصب شـــــبجـــــه بكطعتي وطلع بي بز
ويكل للنـــــاس بس الدود اليه

يكل للـنـاس بس الدود وياه
غدر واوجاغ نـصـ الكلب وياه
ايتظاهر هو ابو الصـولات وياه
ويرد تالي الصـحـيـبـه ايدور اذيه

بثينه قيس ابشعري اعليك ياريت
وانظرك تحن وتعـود ياريت
تجيني اتشوف دمع اشكتر ياريت
على افراكك تشوف اشصار بيه

تناشدني على حالي ولـوـني
هلي والوكت واحبـابـي ولوني
اللاكي الناس بالبـسـمة ولوني
من دمعي ارتوي اوعلتي خفية

يهالتنــــــــــــــ شد عليه كيف حالاك
علي مضملم وكتنــــــــــــه ودوم حالاك
اذا انت ابصــــــــــــل وياك حالاك
انا بطويــــــــــــات جنب لف اديه

ذلولي اكبال عين الاخــــــــــــو مناخ
ونضر جرحي الصحت مرات مناخ
الوكت ذاكه ذهب مانجــــــــــــد مناخ
فكد جفين من اجل الــــــــــــخويه

تبا للريا والــــــــــــصار حربه
مثل كافر يشن عالديــــــــــــن حربه
ترك ربك الك هالدين حــــــــــــربه
الكفر واسلام لاتجــــــــــــمع سويه

وَحَقَّ إِلَيَّ خُلُقُهُ وَفَانِي
أَبَدَ مَا أَنَسَهُ الْبُطْيِيهِ وَفَانِي
وَاجِبَ أَذْكَرِهِ ابْشَعْرِي وَفَانِي
وَاضِلَ وَيَاهُ لِمَنْ تَدْنُهُ الْمَنِيهِ

ابحر طامي صفيث انه ولف راي
والف حسبه انا ابراسي ولف راي
ردت من تيبس ارياي ولف راي
عجب كل الرفاكه اتلوم بيه

جفك لاتمدده الكــــــــــــــــان ماكان
وشخص كلمن عرفته اليوم ماكان
الدهر من يجفي يوم اوياءك ما كان
مثل صاحب يعوفك بالرزيه

من دمــــــــــــــــي حيايه الكاع يردن
خذن دمي وبديله اسمــــــــوم يردن
بس عضــــــــمي بكالي و سمل يردن
وثعابين الوكت تفتــــــــر عليه

المجارات ..

يقول الفصيح..

افي كل يوم انت تعلن ثورة... فهل لك عندي ايها الدهر من
ثأر

كفاك لقد افقرت داري وديرتي.. وطفيت انواري وعفيت
اثاري

وكانت مجاراتي بالابوذيه

علي تعلن ولك كل يوم ثاره

ابوك انه كتلته اترى — د ثاره

كفاك الي اعفرت داره وثاره

وطفيت انوارنه الجانت زهيه

يقول شاعر الفصيح

لو كل كلب عوى القمته حجرا.. لاصبح الصخر مثقالا بدينار
وكانت مجاراتي بالابوذيه

دلالك تعب المهجه حيرها
بشرك وسوار طوكها حيرها
لو كل من عوى القمته حيرها
تعادل بالذهب صخر الوطيه

يقول شاعر الفصيح

واخوان تخذتهموا دروعا .. فكانوها ولكن للاعادي
اردتهم سهاما صائبات .. فكانوها ولكن في فؤادي
وكانت مجاراتي بالابوذيه

اخوي الجنت اضمنه درع منصاب
طلع لعداي ماهو الي منصاب
طلكت سهم بس يا حيف منصاب
فؤادي ومن رميته اندار اليه

الشاعر فى سطور



صبري جعين السعداوي...

الاسم الفني صبري السعدي ...

شاعر شعبي واعلامي عراقي

نائب رئيس فرع ذي قار لتجمع
الشعراء وكتاب الادب الشعبي في
العراق...

شارك في العديد من المهرجانات المحلية والوطنية...

نشرت اغلب قصائده في الصحف والمجلات العراقية
والعالمية...

معد ومقدم برامج اذاعية وتلفزيونية...

احد المؤسسين للمحطات الاذاعية في ذي قار وميسان.

شارك فى فعاليات المهرجان الدولى الثانى للإبداع والفنون
بالقاهرة فى يوليو 2019 وتم تكريمه

محتوى الكتاب

2	بطاقة الكتاب
3	إهداء
4	المقدمة
5	إلى شاعر
7	لا تنظر الفرق العمر
9	إلى حبيبتي
13	تفاح لبنانى
15	ياربىعى
17	يا وطنه
19	جرب صاحبك
22	من أشوفك
25	عشك شاعر
28	سيف اللحظ
33	عسل
36	تعالى

37	 هدينى
41	 ز غير السن
43	 يابو الجدائل
45	 امناطرك
48	 ليه ماتحن
50	 شربت زبيب
52	 مناي انتة
54	 لا تبتعد
55	 علمنى
57	 انتظرتك
60	 محطات
60	 العيد هذا
63	 نبرالكم
64	 اكحيله
65	 وينك انتة
68	 عطش

70	 اجيت الداركم
71	 بيك مغرم
73	 اشتريك
74	 انت فرحى وانت جرحى
77	 بعدنى
79	 صير زلمة
82	 زهيريّات
87	 أبوذيات
93	 المجارات
96	 الشاعر فى سطور
97	 محتوى الكتاب

